



एह आकाशवाणी जम्मू ऐ, बड्डलै खबरें च तुंदा सुआगत, पैहले खास-खास खबरें कन्नै में विजय बजाज।

Headlines

1. कुलगाम च होए दे टाक्करे च सुरक्षाबलें द'ऊं आतंकवादिएं गी मारी मुकाया ऐ। टाक्करे आहली थाहरै थमां ए.के. रफलां ते गोला-बरूद बरामद कीता गोआ।
2. कटुआ जिले च होए दे टाक्करे च जम्मू-कश्मीर पुलस दे इक हैड-कांस्टेबल शहीद होई गे न।
3. जम्मू-कश्मीर च विधानसभा चुनाएं दे त्रीये ते अखीरले गेड़ लेई प्रचार अज्ज संज्ञां समाप्त होई जाहग।
4. प्रधानमंत्री नरेन्द्र मोदी अज्ज आकाशवाणी पर मन की बात कार्यक्रम दे राहें अपने विचार लोकें कन्नै सांझे करडन।



Kulgam Encounter

दक्खनी कश्मीर दे कुलगाम जिले दे आदिगाम ग्रां च सुरक्षाबलें ते आतंकवादिएं बश्कार होए दे इक टाक्करे च कल द'ऊं आतंकवादिएं गी मारी दित्ता गोआ। एहदे शा पैहले होई दी शुरुआती गोलीबारी च फौज दे 4 जवान ते इक पुलसकर्मी जख्मी होई गे हे। एह टाक्करा आदिगाम देवसर गुलगाम च बड्डलै सवेला उसलै शुरु होआ जिसलै सुरक्षाबलें दे दल इलाके च आतंकवादिएं दी मजूदगी बारै सूह थहोने परैन्त उत्थे घेराबंदी ते तपाशी अभियान चला करदे हे। अधिकारिका सूत्तरें मुजब जि'आं गै सुरक्षाबलें दे जवान संदिग्ध थाहरै कश पुज्जे तां उत्थे छप्पे दे आतंकवादिएं उंदे पर हमला करी दित्ता जेहदा सुरक्षाबलें बी बनकदा परता दित्ता। टाक्करे आहली थाहरै थमां ए.के. दिआं द'ऊं रफलां ते होर दुआ जंगी समेयान बरामद कीता गोआ ऐ। तोआई फौज ते जम्मू-कश्मीर पुलस दे सांझे संवाददाता सम्मेलन च अधिकारिएं दस्सेआ जे एह सुरक्षाबलें लेई इक बड्डी कामयाबी ऐ कीजे मारे गेदे आतंकवादी कुलगाम सने घाटी दे होरनें जिलें च केई लोकें दी हत्तेआ दे कसूरवार हे।



Billawar Encounter

कटुआ जिले दी बिलावर तहसील दे कोहग-मांडली ग्रां च कल संज्ञां सुरक्षाबलें ते आतंकवादिएं बश्कार टाक्करे च जम्मू-कश्मीर पुलस दे इक हैडकांस्टेबल शहीद होई गे जदकि इक असिस्टेंट सब-इंस्पैक्टर जख्मी होई गे। कल संज्ञां सुरक्षाबलें आसेआ शुरु कीते गेदे तलाशी अभियान दरान एह टाक्करा शुरु होआ। इलाके च इक घरै च आतंकवादिएं दे इक दल दे छप्पे दे होने दी सूचना मगरा एह अभियान चलाया गेदा हा। टाक्करे च इक हैडकांस्टेबल हुंदी मृत्यु होई गेई ते इक असिस्टेंट सब-इंस्पैक्टर जख्मी होई गे।



Campaigning

जम्मू-कश्मीर च विधानसभा चुनाएं दे त्रीये ते अखीरले गेड़ दा प्रचार अज्ज संभा'रदा ऐ। इस गेड़ च 40 विधानसभा हलकें च मंगलवारें वोट पौने न। इंदे च कश्मीर डिवीजन दे 16 हलके ते जम्मू डिवीजन दे 24 हलके शामिल न। वोटें दी गिनतरी 8 अक्टूबर गी होग।

<><><><><><>

BJP & Congress Rally

प्रधानमंत्री नरेन्द्र मोदी होरें कल आखेआ जे जम्मू-कश्मीर गी केन्द्र शासित प्रदेश च बदलने दा फ़ैसला अस्थाई ऐ ते उंदी अगुवाई आहली सरकार परतियै एहदा राज्य दा दर्जा बहाल करोग। प्रधानमंत्री होरें विपक्षी कांग्रेस, नेशनल कांग्रेस ते पीडीपी पर लोकें दे अधिकारें गी खुस्सियै, उनें गी जखम देने दा आरोप लाया। मोदी होरें जम्मू कश्मीर च आईआईटी, एम्स, सिडकां, सुरंगां ते बक्ख-बक्ख बुनियादी ढांचे आहली परियोजनाएं ते केई शिक्षा ते सेहत संस्थानें गी कायम करने दे बीजेपी दी सरकार आसेआ कीते गेदे कम्मं दा चेत्ता करांदे होई आखेआ जे औने आहले समें च जम्मू च विकास च होर तेजी औग। उनें आखेआ जे पिछले 60-65 बरें च जम्मू गी हर खेत्तर च नजरअंदाज कीता गेआ। तोआई कांग्रेस पार्टी दिएं महासचिव प्रियंका गांधी वाडरा होरें बिश्नाह च इक रैली गी संबोधित कीता ते अपने पार्टी दे मेदवार नीरज कुंदन लेई लोकें शा समर्थन मंगेआ। उनें बीजेपी पर आरोप लाया जे ओह जम्मू-कश्मीर गी अपने सियासी मोहरें आंगर इस्तेमाल करै करदी ऐ।

<><><><><><>

CEO Jammu

जम्मू-कश्मीर चुनां विभाग नै मतदाताएं ते आम लोकें च पर्यावरण दी सांभ-संभाल बारै जागरूकता पैदा करने च योगदान दिंदे होई इक लक्ख बूहटे लाने दे अपने लक्ष्य गी कल पूरा करी लैता। विभाग नै विधानसभा चुनां दरान ग्रीन स्वीप अभियान तैहत सब्बनें 90 हलकें च इक लक्ख बूहटे लाने दा लक्ष्य तय कीते दा हा। आकाशवाणी संवाददाता मुजब, चुनां विभाग नै इक लक्ख 323 बूहटे हुनै तोहड़ी लोआए न जिंदे चा 5 ज्हार 854 पिछले 24एं घैंटें च लाए गे न। मुख् चुनां अधिकारी पी.के. पोले होरें पर्यावरण गी बचाने आस्तै पौधारोपण करने पर जोर पाया तांजे भविक्ख दी पीढ़िं आस्तै वातावरण गी साफ-सुथरा रक्खेआ जाई सकै।

<><><><><><>

Kathua Elections

पैहली अक्टूबर गी होने आहले त्रीये ते अखीरले गेड़ दे असैम्बली चुनां लेई जम्मू संभाग दा कठुआ जिला पूरी चाल्ली तैयार ऐ। कठुआ च 6 असैम्बली हलके – बनी, बिलावर, बसोहली, जसरोटा, कठुआ ते हीरानगर औंदे न। जिले च कुल 5 लक्ख 6 ज्हार 679 मतदाता न जिंदे चा 2 लक्ख 65 ज्हार 420 मर्द, 2 लक्ख 41 ज्हार 256 महिलां ते 3 थर्ड जेंडर मतदाता बी शामिल न। चुनां आयोग नै जिले च 704 मतदान केन्द्र बनाए दे न जिंदे चा 73 शैहरी ते 631 ग्रामीण मतदान केन्द्र न। जिले च होने आहले मतदान गी बवस्थित ते शांतिपूर्ण ढंगेनै करोआने लेई सब्बै प्रबंध करी लैते गेदे न।

<><><><><><>

MKB

प्रधानमंत्री नरेन्द्र मोदी होर अज्ज आकाशवाणी पर मन की बात कार्यक्रम राएं अपने बचार देश विदेश दे लोकें कन्नै सांझे करडन। एह कार्यक्रम अज्ज दिनै 11 बजे आकाशवाणी ते होरनें नेटवर्क पर कन्नो-कन्नी प्रसारत कीता जाग। इस म्हीनेवार कार्यक्रम दी एह 114मीं किशत होग ते नरेन्द्र मोदी हुंदे लगातार त्रीऽ बारी देसै दा प्रधानमंत्री बनने परेंत उंदे इस कार्यक्रम दी एह चौथी किशत होग। मन की बात कार्यक्रम दा प्रसारण आकाशवाणी ते दूरदर्शन दे समूलचे नेटवके सने आकाशवाणी खबरें दी वैबसाइट, न्यूज ऑन ए.आई.आर. मोबाइल ऐप पर कीता जाहग। ए.आई.आर. न्यूज, डीडी न्यूज, प्रधानमंत्री हुंदे दफतर ते सूचना ते प्रसारण मंत्रालय दे यूट्यूब चैनलें पर बी इस कार्यक्रम दा सिद्धा प्रसारण कीता जाहग। आकाशवाणी दे क्षेत्रीय चैनलें पर एहदे हिंदी प्रसारण दे तुरत मगरा एहदा मकामी भाशाएं च अनुवाद प्रसारत कीता जाहग।

<><><><><><>

Ext. Affairs Minister

विदेश मंत्री एस. जयशंकर होरें आखेआ ऐ जे पाकिस्तान दी सीमा पार आतंकवाद फैलाने आहली नीति कदें बी कामयाब नेई होग ते एह्दे माड़े नतीजे पक्क गै सामने औडन। विदेश मंत्री होर कल रातीं न्यूयार्क च संयुक्त राष्ट्र महासभा दे 79में इजलास गी संबोधित करै करदे हे। उनें आखेआ जे दौनें मुखे बशकार बकाया पेदे मसलें च पाकिस्तान आसेआ भारत दे इलाकें पर कीते गेदे नजैज कब्जे गी खाना कराना ते आतंकवाद गी बढ़ावा देने दी ओदी परानी नीति गी बंद करना शामिल न। डाक्टर जयशंकर होरें गवांडी मुखे दी निंदेआ करदे होई आखेआ जे पाकिस्तान दी कनीते कन्ने होरनें देसें पर असर पेआ ऐ ते खासतौर पर गवांडी मुखे मते प्रभावत होए न। उनें इब्बी आखेआ जे पाकिस्तान इसलै अपने कर्मे दी सजा भुगता करदा ऐ। उनें आखेआ जे इक नकारा मुखे, जेहड़ा दुए देसें दी जिमीं हड़पने दे नापाक मंसूबे बना'रदा ऐ, ओदा पर्दाफाश करने ते उसी रोकने दी सख्त लोड़ ऐ।

<><><><><><>

Chief Secretary

मुख्य सचिव अटल डुल्लू होरें औद्योगिक संगठनें पास्सेआ पुट्टे गेदे मुद्दे पर कीती गेदी कारवाई दी समीक्षा लेई वरिष्ठ अधिकारिण दी कल इक बैठक लाई। इस मौके पर औद्योगिक खेत्तर कन्ने सरबंधत बक्ख-बक्ख मामलें जियां जीआई प्रमाणिकरण, निर्यात विकास, कंटेनर डिपुण दे विकास, ओटीएस कमेटिण गी चालू करने ते औद्योगिक खेत्तर लेई पट्टे पर दित्ती गेदी जिमीं दी अवधि होर बधाने सरबंधी नीति आले मामले शामिल हे। बैठक दरान पुट्टे गेदे मामलें दी समीक्षा करदे होई मुख्य सचिव होरें अधिकारिण गी आखेआ जे ओह तैह समे दे अंदर अंदर इंदे पर लोड़चदी कारवाई करन।

<><><><><><>

DC Doda

डोडा दे डिप्टी कमीशनर हरविंदर सिंह होरें जिला शिड़क सुरक्षा कमेटी दी कल चौथी बैठक दी प्रधानता कीती। बैठक दरान जिले च ट्रैफिक प्रबंधन च सुधार ते शिड़क सुरक्षा हीलें च बाढ़े पर ध्यान केन्द्रित कीता गेआ। डिप्टी कमीशनर होरें मकामी समुदायें अंदर शिड़क सुरक्षा बारे जागरूकता पैदा करने लेई जागरूकता पैदा करने लेई जागरूकता अभियाने दे महत्वे पर लोह पाई। उनें मुंसिपल अधिकारिण गी निर्देश दित्ते जे ओह कस्बे अंदर गैर जरूरी अवरोधकें गी हटान तां जे बेवजह लगने आले गड्डिण दे जाम कोला बचेआ जाई सकै। उनें सब्बने सरबंधत विभागें गी आखेआ ऐ जे ओह शिड़क सुरक्षा उपायें गी लागू करने , गड्डिण दी रफतार दी हद्द पर निगरानी रखने, शिड़कें दे रक्ख-रखाव ते फौरी तौर पर मरम्मत-सुधार दे कर्मे लेई आपू चै नेड़मा तालमेल बनाइयै कम्म करन।

<><><><><><>

Congress President

कांग्रेस पार्टी दे प्रधान मल्लिकार्जुन खरगे होर अज्ज कठुआ जिले च जसरोटा थाहर ते उधमपुर जिले च रामनगर थाहर चुनावी रैलिण गी संबोधित करडन। जसरोटा च दिने 11 बज्जिये 50ए मिनटें पर ते रामनगर च दपेहरी 1 बजे एह रैलियां होडन। उंदे कन्ने पार्टी दे दुए नेता बी होडन। तोआई उधमपुर पश्चिम, बनी ते नगरोटा हलकें च बी पार्टी दे राष्ट्री नेताएं आसेआ रैलिण गी संबोधित करने दा अज्ज कार्यक्रम ऐ।

<><><><><><>